

Atuariartortunut atuartut angerlarsimaffianiititsisarneq pillugu Namminersorlutik Oqartussat nalunaarutaat nr. 76, 21. december 2021

Atuarfik pillugu Inatsisartut inatsisaat nr. 15, 3. decembari 2012-imeersumi § 25, imm. 7. naapertorlugu aamma Inatsisartut inatsisaat nr. 21, 13. novembari 2017-imeersukkut allangortinneqartukkut matumuna imatut aalajangersaasoqarpoq:

Kapitali 1

Atuartut angerlarsimaffiisa siunertaat saaffigineqartullu

§ 1. Atuartunut angerlarsimaffiup siunertarivaa, atuartunut pisussaaffilimmik, killiliisumik naleqartinneqartumillu najugaqartitsinissaq, taamaaliornikkut atuartut atugaqarnerat, peqqissusiat, toqqissisimanerat aamma ilinniarnissamut inuttullu ineriartornissamut killissat patajaatsuullutik. Atuartut angerlarsimaffianniinnermi atuartut atuarnerat aamma ilinniakkaminnik naammassinnissinnaanissaat tunngavissinneqartarpoq.

Imm. 2. Atuartut angerlarsimaffiat atuartut sapinngisamik nalinginnaasumik angerlarsimaffimmi toqqissisimanartumut assingusumik inuuneqarnissaat anguniarlugu aaqqissuunneqassaaq ingerlanneqarlunilu. Sulisut tamanna sulinerminni inuttullu isumassuisuunerminni qulakkiissavaat.

§ 2. Atuartut angerlarsimaffianniinnissaq atuartunut 9. aamma 10. klassini atuartunut namminneq illoqarfigisaminni nunaqarfigisaminniluunniit Meeqqat atuarfiat pillugu Inatsisartut inatsisaat naapertorlugu atuarnissamik neqeroorfigineqarsinnaanngitsunut neqeroorutaassaaq. Illoqarfigisami nunaqarfigisamiluunniit imatut paasineqassaaq, illoqarfik nunaqarfilluunniit atuartut maannakkut atuarfigisaat.

Imm. 2. Kommunalbestyrelse angajoqqaatut oqartussaassusilinnik imaluunniit atuartup pilersuisuanik isumasioqateqareerluni, Atuarfik pillugu Inatsisartut inatsisaanni tak. § 34, imm. 2. atuartup akuersissutigippagu, atuartoq suli 9. klassinngunngitsoq atuartut angerlarsimaffimmiinnissaanik neqeroorfigineqassaaq, atuartup suliatigut inuttullu ineriartornera aamma atuartup inerissimassusia, immikkut pisariaqartitsinera aamma illoqarfigisami atuarfiup ilusilersorneqarnerata tamanna ajornartinnigippagu.

Kapitali 2

Perorsaanertaanut tunngasut

§ 3. Atuartut angerlarsimaffianniinneq sammisassa qarfiussaaq, tamakku atuartut aallaavittut atugaannik, ilikkarniarnerannik atuartullu nammineq inuunerminik isumaginninnermini ineriartornera siuarsarneqassapput, peqqinnartunik toqqaasassapput, akisussaaffeqarnermik misigisimassapput, suleqatiginnikkusussuseqassapput aamma ilikkagaqarnissamut kajumissuseqassapput.

Imm. 2. Atuartup pissuserissaarnermik, perorsarneqarnerminik aamma pissusilersornermigut ineriartornermini tapersorneqarnissaa siunertaralugu atuartut angerlarsimaffimmiinneranni aamma makku ilaatinneqassapput:

- 1) ilinniagassalerinerit, tassunga ilanngullugit ilinniagassalerinermi ikiorneqarnerit,
- 2) ataatsimoorluni sammisassat angerlarsimaffippalaartut, soorlu iffiornerit, juullimut pinneraanerit il.il.,
- 3) illumi pisussaaffiit soorlu nerisassiornerit eqqiaanerillu,
- 4) timersornermut sunngiffimmilu sammisaqarnissamut peqataasinnaanerit,
- 5) spilinik, atuakkanik nipilersukkanillu atuisinnaanerit, aamma
- 6) ullut aalajangersimasumik sammisaqarfiit, sammisat soorlu nakkarsaanerit, kiserliornerit, timikkut ineriartornerit, tassunga ilanngullugit kinguaassiutinut sammisut, kinguaassiutinut tunngasut killissarititat illersuutillu, aanngajaarniutit, atuarumanginnerit, ilinniagassamik suliffissamillu toqqaanerit, tamatumani oqalugiarnerit suliffeqarfinnullu aamma ilinniarfinnut pulaarnerit ilanngunneqarsinnaapput, tassunga ilanngullugit maligassiuusut.

§ 4. Atuartut angerlarsimaffianni perorsaanikkut sammisassanik aaqqissuussinerni ilitersorteqarnerup pilersinneqarnissaa kommunalbestyrelsip qulakkeertussaavaa, tak. imm. 2 aamma 3, assingusunilluunniit suliassa qarfiit akimorlugit suleqatigiinnerit.

Imm. 2. Iltersorteqarnermi ilitersortit ataaseq arlalilluunniit atuartut pisariaqartitai aallaavigalugit assersuutigalugu isumassuisutut, ilitersuisutut, ikorfartoqatitut, maligassiuusutut, siunnersortitut, immersortittut, isummernissamut tapersersortittut aamma atuartup suliassaanik ikiuuttutut taaneqartut atorneqarsinnaapput.

Imm. 3. Iltersorteqarneq ingammik atuartumut tarnikkut nappaatip suussusianik nalilerneqartunut atorneqartarpoq, imaluunniit naliliisoqarneratigut:

- 1) inersimasunik patajaatsumik attaveqanngitsunut,
- 2) kiserliortunut aamma ilisarimasartaarnissamut ajornartorsiortunut,
- 3) atuartut angerlarsimaffianni, atuarfimmi sunngiffimmiluunniit pissutsit piviusunik naammattuinerminni isumaginninnissaminnut sakkussa qanngitsut,
- 4) nakkarsarneqaleraangata.
- 5) ullaakut itertikkuminaakkaangata, imminnut immikkoortikkaangata atuarumangikkaangataluunniit,
- 6) atuartitsinerni immikkut tapersorneqarnissamik pisariaqartitsisunut,
- 7) meeqqat atuarfianniit inuusuttut ilinniarfiannut ikaarsaarniarnissamik siunertaqarnermi tapersorneqarnissamik pisariaqartitsisunut, imaluunniit
- 8) immikkut pisariaqartitsisumut innarluuteqarnikkut inuttulluunniit unammilligassa qarnikkut.

Kapitali 3

Init

§ 5. Atuartut angerlarsimaffianni init atuartut sulisullu pisariaqartitaannut naleqqussagaassapput aamma sukkulluunniit illuutinik ikuallannissamullu oqartussaasunit aamma sullivinnik nakkutilliisoqarfimmit akuerineqarsinnaasunngorlugit aaqqissuunneqassapput.

§ 6. Atuartut angerlarsimaffianni ineeqqat atuartunut marlunnut ataasiinnarnullu aaqqissuunneqassapput.

Imm. 2. Ineeqqat arlaannik tunniussinerni atuartumut pitsaanerpaasoq tunngavigineqassaaq, taamaalilluni perorsaанermik eqqarsaatiginninneq aamma atuartup ukiui inerisimassusialu immikkut pingartinneqassapput.

Imm. 3. Atuartup ukiui, inerisimassusia aamma suaassusaa eqqarsaatigalugit pisuni immikkut ittuni atuartut ineeqqami ataatsimut 3 tikillugit inissinneqarnissaat kommunalbestyrelsip akuersissutigisinnaavaa, tamanna meeqqamut pitsaanerpaajusumut naapertuuppat aamma perorsaанermi tamanna ajornartinneqanngippat.

§ 7. Atuartut ineeraat imatut pisatsersorlugit aaqqissuunneqassapput:

- 1) matut atuartut namminneq inuunerat qulakkeerniarlugu matuneqarsinnaasut,
- 2) torsuusaq qaavatigut atisanut kamippannullu inissalik,
- 3) nalaasaarfik siniffinngortartoq imaluunniit siniffik oqorutitut toqqorsivittalik,
- 4) allaffik qullitaqarlunilu issiavittalik,
- 5) atisanut ilisiviit sikaaviillu aamma
- 6) ikinnerpaamik sikaavik ataaseq parnaarneqarsinnaasoq, atuartup nammineq pigisaanut atugassaaq.

Imm. 2. Atuartup ineeraa atuartoq sapinngisamik peqatigalugu aaqqissuunneqassaaq, pisatsersugaaneralu atuartup ukiuinut immaqalu immikkut pisariaqartitaannut naleqquttuussalluni.

§ 8. Atuartut angerlarsimaffiat atuartut atuartut angerlarsimaffianni inuunerannut peqataanissap siuarsarneqarnissaa siunertaralugu aaqqissuunneqassaaq.

Imm. 2. Atuartut angerlarsimaffiat imatut aaqqissuunneqassaaq:

- 1) atuartunut sisamanut ikinnerpaamik perusuersartarfik ataaseq aamma atuartunut marlunnut uffarfik ataaseq,
- 2) ilinniagassalerinermut atortorissaarutit, ataatsimoorluni ilinniagasserinissamut periarfissallit,
- 3) inuttut sammisassanut, ataatsimut aaqqissuussinernut aamma isersimaartarfittut atugassamik ini

ataatsimoorusaaq,

- 4) igaffimmi nerisassiornissanut aamma atuartut nerisassioqataanissaannut aamma perorsaaneramik tunngaveqartumik sassaallertarnissaannut atortorissaarutit,
- 5) nerisarfik igaffimmut atasoq imaluunniit initut ataatsimoorfissatut aaqqissuussaaq,
- 6) inuttut pigisanik inissiiivissaqarnissaaq,
- 7) atortunik digitaliusunik soorlu qarasaasiamik, oqarasuaammik internetimillu atuinissanut atuisinnaanerit,
- 8) errorsisarfik,
- 9) ini sunngiffimmi sammisassaqaartitsivik nutaaliorfilluunniit,
- 10) silami ersarissumik nassuiakkamat sumiiffeqarsinnaanissaaq aamma arsaaffiusinnaallunilu timikkut allatut sammisassaqaarfiusinnaasumut,
- 11) init sulisunut, pequusiviit, teknikimut atortuusiviit, aamma
- 12) pigaartut inaat illup iluani inissineqassaaq inersimasut nakkutilliisut atuartunut sapinngisamik qaninnerpaamiinnissaat aamma attaveqartarnissaat eqqarsaatigalugu. Pigaartut inaat ineeralerlugu, taanna qasuersaartarfittut atorveqartassaaq, aamma allaffilerlugu, nerriveeralerlugu fjernsynilerlugulu aaqqissuunneqassaaq.

Imm. 3. Torsuusanut atasunik inuit naapittarfiannik nerrivilimmik issiavilimmillu aaqqissuussisoqarsinnaavoq.

Imm. 4. Aaqqissuussineq pillugu piumasaqaat ataaseq arlallilluunniit, imm. 2. naapertorlugu Naalackersuisut akuersereernerisigut atuartunut angerlarsimaffioreersut allaanerutinneqarsinnaapput, illuutigeriikkanit tamanna naammassineqarsinnaanngippat. Akuersissut ukiut marluk angullugit sivistigisumik atuuttussaasoq nalunaarutigineqarsinnaavoq, aamma pissutsit immikkut ittut tamanna ajornartinnngippasuk sivitsorneqarsinnaavoq.

Kapitali 4

Sulisut

§ 9. Kommunalbestyrelsip atuartut angerlarsimaffianni aqutsisoq sulisullu allat inatsisit isumaqatigiissutillu atuuttut naapertorlugit atorfinitissinnaallugillu soraarsissinnaavai.

Imm. 2. Atuartut angerlarsimaffianni aqutsisuusoq perorsaanikkut allaffissornikkullu atuartut angerlarsimaffiata imminut illersorsinnaasumik aamma nalunaarut manna naapertorlugu kommunalbestyrelsip aalajangernissaanut malittarisassat naapertorlugit atuartut angerlarsimaffiata ingerlanneqarnissaa akisussaaffigai.

Imm. 3. Atuartut angerlarsimaffianni aqutsisoq meeqqat atuarfianni ilinniartitsisutut, perorsaasutut, isumaginninnermi siunnersortitut allatulluunniit perorsaanermit attuumassuteqartumik ilinniagaqarsimasuussaaq aqutsinissamullu piginnaaneqarluni, taamaattorli tak. imm 4. aamma § 32.

Imm. 4. Kommunalbestyrelsili imm. 3-mi piginnaasaqarnissamik piumasaqaatinik naammassinnittumik atorfik inuttalerneqarsinnaanngippat piumasaqaatinik immikkut ittumik akuersissuteqarsinnaavoq, atorfimmuq qinnuteqaateqartoq allamik ilinniagarisimasani tunuliaqutaralugu

imaluunniit ukiorpassuarni inuussutissarsiummik tassunga attuumassuteqartumik misilittagaqarsimaguni piukkunnartutut isigineqarpat.

§ 10. Atuartut angerlarsimaffiata aqutsisua sulisut allat suleqatigalugit atuartut inuttut suliatigullu ineriartornissaannut tunngavissiisuusinnaasariaqarput.

Imm. 2. Atuartut angerlarsimaffiata aqutsisua sulisut allat peqatigalugit, tassunga ilanngullugit igaffimmi sulisut suliassanillu allanik suliallit, atuartunut isumassuisuussapput, atuartunik nereqateqartassapput aamma atuartunik nakkutilliisuussapput, tassunga ilanngullugit atuarnerat pillugu siunnersornissaat, nerisarnissaannik, eqqiluisaarnissaannik, kinguaassiutitut tunngasunik illersuuteqarnissamullu, aanngajaarniutinik, inuttut pissutsit pillugit tapersersuinerit aamma atuartup atuartullu angerlarsimaffiata akornanni attaveqartarnerit isumagissavaat.

Imm. 3. Atuartut angerlarsimaffianni sulisussarsiorneri sulisunillu tigungminniinnarnerni sulisut perorsaaniikkut piginnaasaannik aamma atuartut angerlarsimaffianni suliassanik isumaginninnissanut pitsaassutsinik pitsanngorsaannissat siunertaralugit sulisut ilinniarteqqinneqartarnissaat ilinniaqqittarnissaallu kommunalbestyrelsi isumagissavai.

§ 11. Kommunalbestyrelsi atuartut angerlarsimaffiini ataasiakkaani sulisut qassiunissaat aalajangersartarpai. Sulisunik amerlassusiliinermi atuartut angerlarsimaffianni atuartut angerlarsimaffeqartinneqarneranni anguniagassat naapertorlugit, tak. § 1, suliarineqarnissaat qulakkeerneqassaaq.

Imm. 2. Atuartut angerlarsimaffianni atuartunik ineqartitsisinnaassuseq, atuartut maannakkut amerlassusaat aamma illunut tunngasut isiginiarlugit kommunalbestyrelsi sulisunik amerlassusiliisassaaq kiisalu suliassat ullup unnuallu ingerlanerani piffissanut assigiinngitsunut attuumassuteqartut eqqarsaatigalugit:

- 1) piffissaq atuarfiusoq,
- 2) ulluklut nal. ak. imaluunniit
- 3) unnuakkut.

Imm. 3. Atuartut angerlarsimaffiata ulloq unnuarlu sulisoqartuaannarnissaa kommunalbestyrelsi qulakkiissavaa.

Kapitali 5

Najugaqartussanngortitsisarneq

§ 12. Kommunalbestyrelsi atuartut atuartunut angerlarsimaffimmi najugaqartussanngortittarpai angajoqqaatut oqartussaassusillit tamatumunnga akuersinerisigut.

Imm. 2. Kommunalbestyrelsi kommunip quppersagaani tamanut takusassiarissavaa atuartunut najugaqartussanngortitsisarnermi periaasiusoq.

§ 13. Kommunalbestyrelsip atuartut najugaqartussanngortissavai tullerriiaarisartut kommunalbestyrelsimiit pilersinneqartumiit, suliamik suliaqartunik inunnik naleqquttunik ingerlatsivinni immikkoortuneersunik inuttaqartoq aqutigalugu pisortat naleqquttut allat akuleruttarlugit, atuartullu angerlarsimaffianni pisortaasut oqaloqatigalugit.

Imm. 2. Tullerriiaarinermi siunertaavoq nalilersussallugu pisariaqarnerisq tullerriiaarinermi perorsaanikkut immikkut ittunik tapersuinermi periaasissanik aqqissuussisoqarnissaa, perorsaanikkut immikkut ittunik ikiorsiissuteqartarnissaq ilassutitut immikkut ittunik atuartitsisarnermi malittarisassat naaportorlugit aqqissuussaasunik kalaallisut aamma danskisut inunnguuseralugit oqaaseqartunik atuartitsinermi, tamatumani aamma ikiorsiissutit perorsaanikkut annertussusissaannik aamma qanoq ittuunissaannik.

Imm. 3. Atuartup tiguneqarnissaanut atatillugu tullerriiaarisartut nalilersuinerini ilanngunneqassapput:

- 1) atuartup ineriartornera, inerisimassusia aamma suliatigut inissisimanagera
- 2) atuartoq inooqatigiinnikkut peqqissutsikkulluunniit ima ajornartorsiortiginersq atuartut angerlarsimaffiini atugassarititat neqeroorutaasut atuartup pisariaqartitaanik naammassinnissinnaanatik atuarfik pillugu Inatsisartut inatsisaat naaportorlugu atuartitsineq allatut ingerlanneqartariaqarluni, tassunga ilaallutik inunnik isumaginninnikkut iliuseqarnerit imaluunniit ilaqutarsianut inissiineq.

Imm. 4. Tullerriiaarisarnermi sinaakuttissat kommunip nittartagaatigut kommunalbestyrelsimit tamanut saqqummiunneqassapput.

Kapitali 6

Piareersarnerq, piviusunngortitsineq angerlarsimaffimmiinnermillu naggasiineq

§ 14. Atuartut angerlarsimaffianniinneq pillugu sukumiisumik paasissutissiisoqarnissaa aamma atuartut ataasiakkaat tamakkulu angerlarsimaffiisa atuartup atuartut angerlarsimaffianniinnissaanut pitsaanerpaamik piareersarnissaat kommunalbestyrelsip qulakkiissavaa, tak. imm. 2. aamma § 15.

Imm. 2. Atuartut angerlarsimaffianniinnissat pillugit paasissutissat innuttaasut ataatsimiisineqarneranni aamma illoqarfigisami nunaqarfigisamiluunniit atuarfimi paasissutissiilluni ataatsimiisitsinerni atuartunut atuartut angerlarsimaffianniilersussanut attuumassuteqarsinnaasutigut paasissutissiisoqartassaaq. Atuartunik angajoqqaatut oqartussaassusilinnut imaluunniit atuartunik pilersuisunut aamma paasissutissiisoqartassaaq.

§ 15. Atuartut angerlarsimaffianniilernissamut piareersarnermi atuartut angerlarsimaffianni aqutsisut, atuarfik atuartut angerlarsimaffianniinnissamut attuumassuteqartoq, atuartoq taassumalu angerlarsimaffia qanimut suleqatigiillutik piareersassavaat.

Imm. 2. Piareersarnermi ilanngunneqartussat:

- 1) atuartut angerlarsimaffiannut aamma atuarfimmut atuartut angerlarsimaffianniinnissami attuumassuteqartumut pulaarnerit, aamma

2) aningaasat aamma suliasat kiisalu atuartut angerlarsimaffianniinnissami atugassarititaasut pillugit ilitsersuinerit.

Imm. 3. Atuartup atuartunut angerlarsimaffimmiinnerata aallartinnerani angajoqqaatut oqartussaassusilinnik isumaqatigiissuteqarnikkut atuartup illoqarfimminit imaluunniit nunaqarfimminit illoqarfimmut atuartunut angerlarsimaffeqarfiusumut angalanissaa kommunalbestyrelsip isumagissavaa.

§ 16. Atuartut atuartut angerlarsimaffianniinneranni atuartut angerlarsimaffiini ataasiakkaani atuartut ukiui, sumiiffimmi pissutsit sammisassallu atuartut sammisarsinnaasaat eqqarsaatigalugit atuartunik pisariaqartinneqartumik nakkutilliinerit pilersinneqarnissaat kommunalbestyrelsip pingaarnertut akisussaaffigai.

Imm. 2. Nakkutilliinermi atuartitsinerup avataani piffissat tamaasa nakkutilliisoqartassaaq, tassunga ilanngullugu atuartut atuarfiup atuartullu angerlarsimaffiata akornanni angalanerat.

§ 17. Atuartut isumassorneqarnissaannut toqqissisimanissaannullu kommunalbestyrelsi qulakkeerinnittussaataavoq aamma nakkutigalugu:

- 1) atuartut atuarnerisa pingaarutai pillugit atuartut ilitsersorneqarnissaat, tassunga ilanngullugit atuakkerisarnerit, nerisassat peqqinnartut sinittarnissarlu,
- 2) meeqqat atuarfianni iliuusissatut pilersaarutunik suliaqarnerni atuartut ikiorserneqarnissaat,
- 3) atuartut atuarnerup avataani sunngiffimmi sammisaqarnissaannut kajumissaarneqartarnissaat kaammattorneqartarnissaallu, tassunga ilanngullugit atuartut angerlarsimaffiisa avataanni sunngiffimmi sammisassanik aqqissuussinerni peqataanissaat,
- 4) atuartut illoqarfigisaminni nunaqarfigisaminniluunniit atuartut ilaquttaminnut, ikinngutiminnut attaveqaatiminnullu attuumassuteqaannarnissaat siunertaralugit atuartut angerlarsimaffianni ilaquttaminnik attaveqassapput, aamma
- 5) atuartut inuttut sammisassanut peqataanissaannut soorlu nuniagiarnernut, piniariarnernut aalisariarnernullu, pinngortitami pisuttuarnernut atuartut illoqarfigisaminnit nunaqarfigisaminnilluunniit ilisimasaannut naleqquttunik sammisassaqaarnissaannut kajumissaarneqartassapput kaammattorneqarlutillu.

Imm. 2. Atuartup piniarnermi, aalisarnermi aamma pinngortitami angalaarnermi peqataanissaanut atatillugu atuartut angerlarsimaffiannut pisortap angajoqqaatut oqartussaassusilinnik erseqqissumik akuersissummik pissarseqqaartarnissaq qulakkiigassaraa.

§ 18. Atuartup atuartullu angerlarsimaffiata ajunngitsumik suleqatigiinnissaat siunertaralugu, tassunga ilanngullugu atuartup atuartut angerlarsimaffimmiinnissaanut naatsorsuutigisat naleqqussarlugit, kommunalbestyrelsip angajoqqaatut oqartussaassusillit imaluunniit atuartup ineriartorerani pilersuisut imatut peqataatissavai:

- 1) angajoqqaatut oqartussaassusillit imaluunniit pilersuisuusut atuartup atuartut angerlarsimaffimmiinnerat pillugu akuttunngitsumik ilisimatittassavai,
- 2) angajoqqaatut oqartussaassusillit imaluunniit pilersuisuusut angajoqqaat ataatsimiisinneqarneranni

peqataasinnaangortillugit, assersuutigalugu oqarasuaatit imaluunniit internetikkut attaveqaatitigut.

3) atuartoq ukiumut ataasiarluni illoqarfigisaminut nunaqarfigisaminulluunniit tikeraartarnissaa nakkutigalugu, aamma

4) angajoqqaatut oqartussaassusillit imaluunniit pilersuisuusut atuartup kaasarfimmiusaanik atisarsiutissaanillu aqutsinissamik neqeroorfigalugit.

§ 19. Atuartup ilaqttatut qaniginerpaasaani napparsimaruloortoqartillugu toqukkulluunniit qimaguttoqartillugu imm. 2. naapertorlugu atuartup ilaqttami qaniginerpaasaasa najugaqarfigisaanut angalanissaanut akiliunneqartarpoq. Akiliussilluni angalatitsisoqassaaq illoqarfiup ilinniarfiusup qaniginerpaasallu pineqartup najugaata akornanni siumut utimullu angalanertut.

Imm. 2. Ilaqtariit qaniginerpaasat tassaapput, imm. 1. naapertorlugu, angajoqqaat, qatanngutit aamma aataakkut aanaakkulluunniit imaluunniit inuit atuartumut ilaqtariittut qanittutut inissisimanermikkut taakkununga nallersuunneqarsinnaasut.

§ 20. Kommunalbestyrelsip atuartut atuartut angerlarsimaffiini ataasiakkaaniittut qaammatikkaartumik ataatsimiittarsinnaaneri imaluunniit atuartut siunnersuisoqatigiiviniq pilersitsisinnaanerat qulakkiissavaa, tamatumani atuartut atuartut angerlarsimaffianniinneranni sammisat assigiinngitsut pingaarutillit oqaloqatigiissutigineqartarnissaanut atuartunut inip pisortatigoortumik pilersinneqarnissaa qulakkearniarlugu aamma atuartut angerlarsimaffianni aqutsisut tamakku pillugit siunnersorneqartarnissaat qulakkiissavai. Tamatumani ataatsimut sammisassat, aaqjissuussinerit, nerisat sammisallu allat atuartut angerlarsimaffianni ulluinnarnut atukkanullu tunngasut attuumassuteqartut ilanngunneqarsinnaapput.

§ 21. Atuartut angerlarsimaffianniinnerata naammassinerani imaluunniit unitsinneqarnerani, tassunga ilanngullugu atuartut angerlarsimaffianniit angerlarneq, tullerriiaarisartut naammassinninneq unitsitsinerluunniit atuartumut pitsaanerpaatinneqarnissaa siunertarlugu taakku peqataatinneqassapput.

Imm. 2. Atuartut angerlarsimaffianniinnerup naammassinerani unitsiinnarneqarneraniluunniit atuartup atuartut angerlarsimaffianniit illoqarfigisaminut nunaqarfigisaminulluunniit aallarsinnaanera kommunalbestyrelsip angajoqqaatut oqartussaassusilinnik isumaqateqarfiginissaat isumagissavaa. Kommunalbestyrelse angajoqqaatut oqartussaassusilinnik isumaqatigiissuteqareerluni atuartup illoqarfigimmut allamut atuartup illoqarfiginngisaanut nunaqarfiginngisaanulluunniit akiliullugu atuartoq angalatinneqarsinnaavoq, atuartup illoqarfigimmi tassani akiliunneqarluni angalaffigisassamini ilinniakkamik aallartitsiniarpat.

Kapitali 7

Illumi malittarisassat ileqqoreqqussanillu malittarisassat aamma malittarisassanik

§ 22. Atuartut angerlarsimaffianni aqutsisoq atuartut angerlarsimaffianni illumi ileqqoreqqusassanillu malittarisassanik atuartunut tamanut saqqummiunneqareerpata atuutilersinnaasunik aalajangersaasinnaavoq.

Imm. 2. Illumi ileqqoreqqusassanillu malittarisassat atuartut angerlarsimaffimmiinnissamut killiliussanik naammaginantumik pilersitsinissamik siunertaqarput aammalu atuartut angerlarsimaffianniinnissamut siunertanik naammassinninnissamut iluaqutaallutik.

Imm. 3. Illumi ileqqoreqqusassanillu malittarisassat assersuutigalugu nerinissamut, angerlarsimaffimmut, innarnissamut aamma atuakkerinissamut, ineeqqani eqqissinissamut, nipiliunnginnissamut, oqarasuaatinik angallattakkanik, qarasaasiaaqqani qarasaasianillu atuinissanut, atuartunut angerlarsimaffiup internetianut soorlu unnuakku isernissamut, torersaanissanut, eqqiaanissanut aamma atuartut angerlarsimaffianniittunik pulaarnissanut piffissanik killilersuinernut tunngassuteqarsinnaapput.

Imm. 4. Illumi ileqqoreqqusassanillu malittarisassat atuartunut sulisunullu iluaqutissanngorlugit aamma atuartut angerlarsimaffianni siunertanut naleqqussarneqarsimassapput aamma atuartut angerlarsimaffiannik ulluinnarni ingerlatsinermut eqqissisimatitsinissamullu aamma ileqqorissaarnissamut pisariaqartinneqartunik sippuisoqassanngilaq.

Imm. 5. Atuartut angerlarsimaffianni aqutsisup atuartut sulisullu allat atuartut angerlarsimaffianniittut illumi ileqqoreqqusassanillu malittarisassat atuartut angerlarsimaffianni anguniagassanut, najorteqatigiittarnissanut, toqqissimanissamut torersuutitsinissallu pillugit tunuliaqutaasut paasineraat qulakkeertussaavai.

§ 23. Atuartup illumi ileqqoreqqusassanillu malittarisassat unioqputippagit atuartut angerlarsimaffianni sulisut tamatuma akuerineqarsinnaannginnera atuartumut ingerlaannaq uparuaatigissavaat. Sulisut atuartumik oqaloqateqarnermikkut atuartup ileqqoreqqusassanik malittarisassat pingaarutaannik paasinninnissaa siunertaralugu unioqputitsinermut pissutaasoq nassaariniassavaa, tamatumani illumi ileqqoreqqusassanillu malittarisassat unioqputeqqinneqarnissaat pitsaalioneqarlutik.

Imm. 2. Atuartup arlaleriarluni imaluunniit sakkortuumik illumi ileqqoreqqusassanillu malittarisassat unioqputittarpagit tamakku akuerineqarsinnaannginnerat pillugit sulisut atuartumut ingerlaannaq uparuaatigissavaat atuartorlu allakkatigit mianersoqqusummik tunillugu. Atuartumik mianersoqqusummik tunisinermi iliuusissatut pilersaarusiortoqarsimanissaa atuartup piomasaaqatigissinnaavaa, tassani atuartoq pissusilersornerminik mianersoqquneqarnerminut pissutaasunik pissusilersorneranik allannguinissaanut ilitsersorneqassaaq tapersersorneqarlunilu. Atuartumut angajoqqaatut oqartussaassusillit imaluunniit piviusumik pilersuisuusut ataatsikkut iliuusissatut pilersaarut aamma mianersoqqusummik tunisineq pillugit ilisimatinneqassapput, tassunga ilanngullugu unioqputitseqqinnermi qaavatigit sunniutaasinnaasut pillugit.

Imm. 3. Atuartoq mianersoqqusummik tunineqareerluni illumi ileqqoreqqusassanillu malittarisassanik unioqputitseqqippat atuartut angerlarsimaffianni aqutsisup siumut nalunaaqqaarluni tamanna atuartumut angajoqqaatut oqartussaassusilinnut piviusumilluunniit pilersuisuusunut

nalunaarutigissavaa aammalu suliaasaq tullerriaarisartunut saqqummiutissallugu, taakkulu pisoq pillugu atuartumik oqaloqatiginnereerpata iliuuseqaqqinnissaq pillugu aalajangiissapput.

Imm. 4. Imm. 3 naapertorlugu iliuuseqaqqinnissamik eqqarsaatersuuteqarnermi, tassunga ilanngullugu angerlartitsinermi, tullerriaarisartut unioqquitsinerup sakkortussusia, atuartup ukiui, isumaqatigiissutaareersimasinnaasut aamma unioqquitsinermi piaarisqaarsimanersoq mianersuaallortoqaarsimanersorluunniit tullerriaarisartut ilanngutissavaat.

§ 24. Tamanna pillugu tullerriaarisartut siumut nalunaaqqaarlutik atuartumut angajoqqaatut oqartussaassusilinnut piviusumilluunniit pilersuisuusinnaasunut atuartup atuartut angerlarsimaffimmiinnera unitsinniarlugu aalajangersinnaavaat taakkunungalugu nalunaarutigalugu, atuartoq atuartut angerlarsimaffiannut, atuartunut allanut sulisunulluunniit pissusilersuutai ilungersunartumik ajornartorsiutaappata imaappatalu:

- 1) atuartoq atuartut angerlarsimaffianni najugaqartoq inunnut pineqartunut nakuuserpat imaluunniit nakuusernissamik siorasaarippat,
- 2) atuartoq aserorterisimappat,
- 3) atuartoq atuartut angerlarsimaffianni najugaqarnermini aanngajaarniutinik tigummisaqarpat imaluunniit atuisarpat, nakorsaatitortinneqarnissaa eqqaassanngikkaanni.
- 4) atuartoq naak ataasiarluni allakkatigut mianersoqquneqareeraluarluni illumu ileqqoreqqusanillu malittarisassanik unioqquitsisimappat, imaluunniit
- 5) atuartunik atuartut angerlarsimaffianniittunik allanik eqqarsaatiginninneq, tassunga ilanngullugit atuartup toqqissisimanerata atugaasalu tamanna pisariaqartippassuk.

Imm. 2. Atuartut angerlarsimaffianni najugaqarneq unitsinneqarpat kommunalbestyrelsip inunnik isumaginninnikkut aaqqissuussinertigut, matumani aamma angajoqqaarsianut inissiinikkut malinnaavigissavaa atuartup ingerlaqqittumik atuartinneqarnissaa, atuarfimmi nalinginnaasumik atuartitsinermut nallersuussinnaasumik aaqqissuussaasumik.

Imm. 3. Atuartup angerlarsimaffianniikkunnaarnermi tullerriaarisartut iliuusissatut pilersaarusiussapput aammalu atuartitsissutaatitaaneq qanoq isumagineqaannassanersoq isummerfigissallugu.

§ 25. Atuartut angerlarsimaffianni sulisut pisariaqarfiani pissaanermik atuillutik iliuuseqarsinnaapput Inatsisartut isumaginninnikkut suliaasaqarfimmi pissaanermik atuisinnaanermut inatsisaanni aalajangersakkat iluanni.

Imm. 2. Pissaanermik atuisoqarpat tamanna atuartut angerlarsimaffianni aqutsisumut ingerlaannaq allakkatigut nalunaarutigineqassaaq, taassumalu angajoqqaatut oqartussaassusilinnut imaluunniit pilersuisunut aamma tullerriaarisartunut nalunaarutigissavaa.

Kapitali 8

§ 26. Kommunalbestyrelse atuartut angerlarsimaffiannik nalinginnaasumik aamma perorsaanermut tunngasunik nakkutilliisuvoq. Nakkutilliinermi pissutsit atuartup inuuffigisai, atuartup pisariaqartitaasa atuartut angerlarsimaffimmiinnerani naleqqussarneqarnissaasa qulakkeerneqarnissaat siunertaralugu aamma atuartut angerlarsimaffianni anguniakkanut naapertuuttumik naleqqussarneqassapput.

Imm. 2. Nakkutilliinermut imatut nalilersuinerit ilanngunneqassapput:

- 1) Atuartut atugaat
- 2) atuartut angerlarsimaffianni perorsaanikkut avatangiisit pitsaassutsillu,
- 3) atuartut angerlarsimaffianni sulisut piginnaasaat, tassunga ilanngullugit sulisunik amerlassusiliinermut kommunalbestyrelsip aalajangersagai malinneqarnersut, aamma
- 4) atuartut angerlarsimaffianni kommunip anguniagaanik naammassinnittoqarnersaq.

Imm. 3. Nakkutilliisut aamma tullinnguuttut makku qulaajassavaat:

- 1) atuartut angerlarsimaffianni init atuartut pisariaqartitaannut perorsaanikkullu sulinernut tunngavissiiinersut
- 2) meeqqanik pinerliisimannginermik uppersaammik pissarsinissamut pisussaaffik pillugu Inatsisartut inatsisaat naapertorlugu atuartut angerlarsimaffianni sulisuinut meeqqanik pinerliisimannginermut uppersaatit piniarneqarsimanersut, aamma
- 3) atuartut angerlarsimaffianni aqutsisui siusinnerusukkut nakkutilliinermut atatillugu uparuaasoqarsimappat malitseqartitsisimanersut.

Imm. 4. Kommunalbestyrelse ikinnerpaamik ukiumut ataasiarluni pisortatigoortumik nakkutilliisassaaq, tamannalu nalunaaqqaarluni aamma nalunaaqqaarani pisassaaq.

Imm. 5. Pisortatigoortumik nakkutilliineq, tak. imm. 4, arlaannaanulluunniit pituttorsimannngitsumik ingerlanneqartassaaq atuartut angerlarsimaffiannilu allanik suliaqartumut ingerlanneqarsinnaanngilaq, soorlu ilitersuinerimik imaluunniit aqutsinermik suliaqartumut, suliaassalli assigiinnngitsut suliarineqarneranni pisussaaffiit erseqqissumik immikkoortiterneqarsimappata tamanna aatsaat pisinnaavoq.

§ 27. Kommunalbestyrelse nakkutilliinerit ataasiakkaat kingorna § 26, imm. 4. naapertorlugu nakkutilliinermut nalunaarusiortassaaq, taanna malitseqartitsinermut paasissutissiisumik naammaginantumillu tunngavissaqarnissamik qulakkeerinnittuussaaq.

Imm. 2. Nakkutilliinermut nalunaarusiaq minnerpaamik § 26, imm. 2 aamma 3-mi pissutsit eqqaaneqartut misissuiffiqineqarnerannik aamma isummerfigineqarnerannik imaqassaaq, tassunga ilanngullugu pissutsit suut pitsanngorsaavigineqassanersut aamma iliuseqarfigineqassanersut.

Imm. 3. Nakkutilliinermi nalunaarusiami aamma nakkutilliartorneq nalunaarutigineqaaqqaarsimanersaq nalunaarutigineqaaqqaarsimannginnersorluunniit aamma oqaatigineqassaaq.

§ 28. Nakkutilliinermi nalunaarusiaq kingusinnerpaamik ullormi nakkutilliiffiusimasumit qaammatit

marluk qaangiunneranni naammassillugu suliarineqareersimassaaq kommunillu nittartagaatigut tamanut saqqummiunneqarluni. Tamanut saqqummiussineq pissaaq paasissutissat inunntut ataasiakkaanut tunngassuteqartut takuneqatsaalillugit.

§ 29. Kommunalbestyrelse nakkutilliinermut malitseqartitsisassaaq, atuartut angerlarsimaffianni pissutsinik uparuartariaqartunik paasinnittoqarsimappat.

Imm. 2. Malitseqartitsineq ingerlatseriaaseq aalajangersimasooq tunngavigalugu pisassaaq, taanna kommunalbestyrelsimit aalajangersarneqassaaq.

Imm. 3. Kommunalbestyrelse nakkutilliinermut malitseqartitsinertut atuartut angerlarsimaffiini tamani pissutsinik uparuartariaqartunik paasinnittoqarfiusimasuni tamani suliamik ingerlatseqqinnissamut iliuusissatut imaluunniit ineriartortitsinissamut aalajangersimasunik pilersaarusiussaaq.

Kapitali 9

Nakkutilliineq pingaarneq

§ 30. Ilinniartitaanermut Naalakkersuisoqarfimmit kommunalbestyrelse paasissutissanik tunniusseqquneqarsinnaavoq, tassunga ilanngullugit allakkianik, kommunalbestyrelsip nalunaarut taanna naapertorlugu nakkutilliisuutitaanerminik isumaginninnersooq paasiniallugu pisariaqartinneqartut isigineqartunik tunniusseqquneqarsinnaavoq.

Imm. 2. Imm. 1-imi suliasatut taaneqartut Ilinniartitaanermut Naalakkersuisoqarfimmi isumagineqarnissat siunertaralugit kommunalbestyrelse imatut iliussaaq:

- 1) § 27-mi taaneqartut nakkutilliinermut nalunaarusiat Ilinniartitaanermut Naalakkersuisoqarfimmut ingerlateqqissavai, aamma
- 2) atuartut atuartut angerlarsimaffianniittut amerlassusiat, atorfiit amerlassusilerneqarnerat aamma atorfiit qanoq inuttaqartinneqarnerisut pillugit paasissutissanik nalunaarutiginnissalluni, tassunga ilanngullugit ilinniagarisimasanik tunuliaqutigisat.

Imm. 3. Kommunalbestyrelsip immikkoortoq 1 aamma 2-mi paasissutissat taaneqartut piffissaliussat malillugit Ilinniartitaanermut Naalakkersuisoqarfimmut nassiutissavai.

Imm. 4. Kommunalbestyrelsip immikkoortoq 2-mi taaneqartut nalunaarutiginninnerit Ilinniartitaanermut Naalakkersuisoqarfimmit elektroniskiusumik nalunaarutiginniffissatut oqaatigisaanut nassiutissavai.

Kapitali 10

Atortuulerfia

§ 31. Nalunaarut manna atuutilerpoq ulloq 1. januar 2022.

§ 32. § 9, imm. 3. aamma 4. aqutsisunut nalunaarutip matuma atuutilersinneqarnerani atuartut angerlarsimaffiini sulisunut atuutinngilaq.

Namminersorlutik Oqartussat, ulloq 17. decemberi 2021

Peter Olsen

Ilinniartitaanermut, Kultureqarnermut, Timersornermut Ilageeqarnermullu Naalakkersuisoq

/ Karsten Peter Jensen